

YANGI O‘ZBEKISTON

Ijtimoiy-siyosiy gazeta

№ 63 (1124), 2024-yil 29-mart, juma



www.yuz.uz



yuz.uznews



yuz_official



yuz.uz_news




yuz



HUDUDLARARO HAMKORLIKNI RIVOJLANTIRISH UCHUN KENG IMKONIYATLAR BORLIGI QAYD ETILDI

O‘zbekiston Respublikasi Prezidenti Shavkat Mirziyoyev 28-mart kuni Xitoy Xalq Respublikasining Shinjon-Uyg‘ur avtonom rayoni Xalq hukumati raisi Erkin Tuniyaz boshchiligidagi delegatsiyasini qabul qildi.



O‘zbekiston va Xitoyning ko‘p qirrali hamkorligini yanada kengaytirish, shu jumladan, O‘zbekiston hududlari va SHUAR o‘rtasidagi amaliy aloqalarni rivojlantirishning ustuvor yo‘nalishlari ko‘rib chiqildi.

O‘zbekiston — Xitoy do‘stlik va barcha sharoitda strategik sheriklik munosabatlaridagi bugungi yuksak daraja katta mamnuniyat bilan qayd etildi.

O‘zbekistonning Shinjon-Uyg‘ur avtonom rayoni bilan tovar ayirboshlashi oshmoqda — bugungi kunda mamlakatlarimiz o‘zaro savdosining qariyb 10 foizi shu hududga to‘g‘ri keladi.

SHUARning yetakchi kompaniyalari bilan hamkorlikdagi investitsiya loyihalari portfeli 3,5 milliard dollarni tashkil etib, bugungi kunda “yashil” energetika va elektrotexnika, qurilish tarmog‘i va yangi turdagi qurilish materiallarini ishlab chiqarish, metallurgiya, infratuzilmani modernizatsiya qilish va boshqa yo‘nalishlarni qamrab oladi.

Madaniy almashinuvlar dasturi faol amalga oshirilmoqda.

Davlatimiz rahbari SHUAR bilan o‘zaro manfaatli hamkorlikni yanada rivojlantirish va qo‘shma loyihalarni jadallastirish muhimligini ta’kidladi. Innovatsion texnologiyalar, qishloq va suv xo‘jaligi, transport va logistika, bank-moliya sohasi, ta’lim, an’anaviy tibbiyot kabi bir qator ustuvor yo‘nalishlar ko‘rsatib o‘tiladi.

O‘zbekiston har yili Urumchi shahrida o‘tkazib kelinayotgan “Ekspo Xitoy — Yevroosiyo” bosh ko‘rgazmasida faol ishtirok etishi qayd etildi.

Uchrashuvda gumanitar va turizm aloqalarini rivojlantirish masalalari ham atroflicha muhokama qilindi. “O‘zbekiston — Qirg‘iziston — Xitoy” temir yo‘lini qurish loyihasini ilgari surishga alohida e’tibor qaratildi.

O‘ZA

TA’LIM SIFATINI OSHIRISH BO‘YICHA REJALAR TAQDIMOT QILINDI

Prezident Shavkat Mirziyoyev maktab ta’limini rivojlantirish va sifatini oshirishga oid rejalar taqdimoti bilan tanishdi.

“O‘zbekiston — 2030” strategiyasida ta’lim tizimi islohotlari eng birinchi vazifa etib belgilangan. Shunga muvofiq, bu soha ham umumiy, ham ixtisoslashtirilgan tarzda rivojlantirilmoqda. Jumladan, yurtimizda 14 ta Prezident maktabi, 9 ta ijod maktabi va 182 ta ixtisoslashtirilgan maktab faoliyat yuritmoqda.

O‘tgan yillardagi tajriba va hayot talabidan kelib chiqib, ulardagi yo‘nalishlarni takomillastirish nazarda tutilmoqda.

Xususan, Mirzo Ulug‘bek nomidagi ixtisoslashtirilgan maktabda Myunxen texnika universiteti bilan hamkorlikda, tajriba tariqasida, muhandislik dasturlarini joriy qilish taklif etilmoqda. Bu dastur “Yangi O‘zbekiston” universiteti dasturi bilan integratsiya qilinadi.

Yuqori malakali pedagoglar imkoniyatlaridan keng foydalanish maqsadida Prezident ta’lim muassasalari agentligi huzurida jamoatchilik asosida “Fan kengashlari” tuziladi. Bu kengashlar ta’lim dasturlarini ishlab chiqish, baholash tizimini takomillastirish, o‘qituvchilarning kasbiy mahoratini oshirishga jalb qilinadi.

Kelgusi o‘quv yilidan 14 ta maktabda fanlarni ingliz tilida o‘qitishni yo‘lga qo‘yish. 2025-2026-yillarda 8 ta yangi ixtisoslashgan maktab qurish rejalari ham aytib o‘tiladi.

Ijod maktablari bo‘yicha ham takliflar bor. Jumladan, ularda taniqli adiblar va jamoat arboblari ishtirokida mahorat darslari tashkil etiladi. O‘quvchilarning ijodiy ishlarini Yozuvchilar uyushmasi hisobidan nashr etish yo‘lga qo‘yiladi. Turli ko‘rik-tanlovlarni o‘tkazish orqali iqtidorli yoshlar qo‘llab-quvvatlanadi.

Ta’lim sifatini oshirishda fan olimpiadalari muhim. So‘nggi yillarda g‘oliblarni munosib rag‘batlantirish tizimi joriy etilgan natijasida bilimda intilish kuchaydi. Talabgor o‘quvchilar, “katta beshlik” fan olimpiadalarida qo‘lga kiritilgan medallar avvalgiga nisbatan ikki baravar ko‘paydi. Mamlakatimizda Al-Farg‘oniy, Beruniy, Mendeleyev nomidagi xalqaro olimpiadalar o‘tkazildi.

Bu ishlarni yangi bosqichga ko‘tarish maqsadida O‘quvchilarni fan olimpiadalariga tayyorlash markazi tashkil etish taklif qilinmoqda. Unga yetuk olimlar va xorijiy mutaxassislar jalb etiladi, o‘quvchilarning har biri rivojlanish dasturi orqali maqsadli tayyorlanadi.


O‘ZA

Shukuh TAYANCH NUQTA

Prezidentimizning Namanganga bu safargi tashrifi nafaqat viloyatimiz, balki butun yurtimiz tarixida o‘chmas iz qoldirdi. Negaki tashrif doirasida iftorklik dasturxonini yozildi. Hozir juda oddiy qilib aytaymiz. Aslida, bu nihoyatda katta voqea bo‘ldi. Davlatimiz rahbari bilan bir paytda mamlakatimiz bo‘ylab nuroniylar, jamoatchilik vakillari ezgulik ulashilgan bitta dasturxon atrofida jamlandik. Xalqimizga xos samimiy muloqot qildik. Shu ma’noda, ma’rifiy tadbir xalqimiz va davlatimizning birdamlik ramzi bo‘ldi.

Xalqimiz tabiatan e’tiqodida sobit, elparvar, vatansavar. Bu ezgulik, poklik ramzi bo‘lgan Ramazon oyida yaqqol ko‘zga tashlanadi. Ulug‘ ayyom kunlarida saxovat qilish, keksa, kasalmand kishilar holidan xabar olish ko‘payadi. Bir-birimizga mehr-ohibatimiz yanada ortadi. Bugungi tezkor zamonda xalqlarning shu kabi asl va azaliy qadriyatlarini saqlab qolish juda muhim. Buning uchun, avvalo, yoshlar tarbiyasiga e’tibor qaratish zarur. Yoshlar — yurtning katta kuchi, eng bebaho boyligi, o‘zgarishlarni tez qabul qiladigan qatlam. Demak, ularning ta’lim-tarbiyasiga qaratilgan e’tiborni bir lahza susaytirib bo‘lmaydi.

Davomi 2-betda



DAXLDORLIK HISSI

Statistik ma’lumotlarga ko‘ra, mustaqillik arafasida — 1991-yilda mamlakatimiz aholisi 20 million kishini tashkil etgan. Bugun O‘zbekiston — xalqi 37 million kishidan iborat, tobora rivojlanib borayotgan, o‘z oldiga suveren, demokratik, huquqiy, ijtimoiy, dunyoviy davlat barpo etishni maqsad qilib qo‘ygan, dunyoning deyarli barcha mamlakati e’tirof etayotgan, nufuzi kundan kunga ortib borayotgan ozod va hur davlat.

KURASHMOQ — O‘ZINI O‘ZI YENGMOQ

Shahar va qishloqlarimiz qiyofasi kun sayin o‘zgarib bormoqda. Nafaqat yaqin ikki-uch yilda mamlakatimizga kelmagan xorijlik do‘stlarimiz, hatto o‘zimiz ham yurtimizdagi o‘zgarishlar, tub islohotlar tufayli tobora taraqqiy etayotgan iqtisodiyotimizdagi yangiliklar mohiyatini anglashga ulgurmayapmiz. Davlatimiz rahbari ta’kidlaganidek, barcha sohaga raqamlashtirish, “yashil” va innovatsion texnologiyalar jadal kirib kelmoqda, yangi-yangi zamonaviy sanoat va energetika majmualari, avtomobil va temir yo‘llar, texnopark va IT-parklar, “aqli” va elektron boshqaruv tizimlari barpo etilmoqda.

Biz oldimizga ulkan maqsadlar qo‘ydik. Ulardan ko‘zlagan orzu-niyatlarimiz inson qadrini ulug‘lash, uning yashashi, turmushi, mehnat qilishi, zamonaviy ta’lim turlaridan bahramand bo‘lishi uchun munosib shart-sharoit yaratishdan iborat.

Umumxalq muhokamasi natijasida qabul qilingan “O‘zbekiston — 2030” strategiyasi bizni buyuk marralar sari safarbar etmoqda. Ushbu strategiyaga muvofiq, 2030-yilgacha yalpi ichki mahsulot hajmini 2 barabar oshirib, 160 milliard dollarga, aholi jon boshiga daromad miqdorini esa o‘rtacha 4 ming dollarga yetkazishni reja qilganmiz.

Shubhasiz, bu juda murakkab, har birimizdan ulkan bilim, salohiyat, fidokorona mehnat qilishni, xalqimizdan milliy birlik, uyushqoqlik, har jahdada jasorat va kuchli iroda ko‘rsatishni talab etadigan vazifalardir. Biroq mutafakkir alomalarimizning ilmiy-ma’naviy merosidan ruhlanib, davlatimiz rahbari tomonidan belgilangan va



ilmiy asoslangan strategik rejalariga suyan-gan xalqimiz ko‘zlangan marralarga, albatta, erishadi. Bunga hech kimda shubha yo‘q.

Ayni paytda yana bitta muhim, tarixda isbotlangan haqiqat bor: kimki o‘zining bugungi holatidan qoniqish hosil qilib, erishgan yutuqlariga mahliyo bo‘lib, yolg‘on maqtovlarga uchib yashasa, undaylarning kelajagini tasavvur etish qiyin emas. Buning sabablari ko‘p.

Bugun davr butkul boshqacha: siyosatlar, milliy manfaatlar, qarashlar katta tezlikda, odatiy tarzdagi evolyutsion holatda emas,

aksincha, shiddat bilan, inqilobiy tusda o‘zgarib bormoqda. Jahoniy beshaqat jarayonlar, siyosiy-mafkuraviy kurashlar, ayovsiz ziddiyatlar, davlatlararo, mintaqalararo, sivilizatsiyalararo kelishmovchiliklar bu yorug‘ olamni jar yoqasiga keltirib qo‘ydi. Tinchlik degan muqaddas qadriyat mo‘rt bo‘lib qoldi. Eng yomoni, ana shunday vaziyatda endi hech kim dunyoda sodir bo‘layotgan voqea-hodisalardan chetda turlmaydi. Barchaning taqdiri o‘zaro bog‘liq. Bu — birinchi.

Davomi 3-betda

TAHLIL VA TAQQOS

AHOLINI RO‘YXATGA OLISH SHUNCHAKI STATISTIKA EMAS

Aholini ro‘yxatga olish — umumdavlat miqyosidagi keng ko‘lamli tadbir, aholi to‘g‘risidagi ishonchli axborot manbai. Buning natijasida aholi soni, yashash sharoiti, ma’lumoti, ta’lim darajasi, bandligi, yoshi, jinsi, milliy tarkibi, hududlarda joylashuvi va boshqa ijtimoiy-demografik masalalar to‘g‘risida to‘liq ma’lumotlar yig‘iladi.

Joriy hisob-kitoblarga ko‘ra, 2024-yil 1-yanvar holatiga mamlakatimiz aholisi soni 36 million 799 ming 728 kishiga yetdi. Mamlakat taraqqiyoti yo‘lidagi islohotlar inson qadrini ulug‘lash, aholi daromadlarini oshirish va ularga munosib turmush sharoitlarini yaratishga qaratilgan.

Lekin xalqaro tajribadan ma’lumki, joriy hisob-kitoblar aholining turmush tarzi, iqtisodiy ahvoli, bandligi, uy-joyi, daromad manbalari va boshqa ijtimoiy yo‘nalishlar haqida aniq xulosa hamda tahlillar qilishga yetarlicha imkoniyat bermaydi.

Davomi 4-betda

“YASHIL” ENERGETIKA taraqqiyot yo‘li mash’ali



2

